

Angajoqqaat naartunermut, erninermut qitornavissiarternermullu atatillugu sulinnigiffeqarsinnaatitaanerisa sapaatit akunnerinik sisamanik sivitsorneqarnissaa siunertaralugu Inatsisartut Inatsisaata nr. 14-p 17. december 2009-meersup allannngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allannguut atuutilissaaq ulloq 1. juli 2018.

(Inatsisartunut ilaasortaq Randi Vestergaard Evaldsen, Demokraatit)

Akissuteqaat

(Isumaginninnermut, Ilaqutariinnut, Naligiissitaanermut, Inatsisinillu atuutsitsinermut Naalakkersuisoq)

Siullermeerneqarnera

Siunnersuutigineqartumut Inatsisartunut ilaasortaq Randi Vestergaard Evaldsen qujassuteqarfigissavara.

Ilaqutariit meerartallit atugaasa pitsanngorsaaviginissaat Naalakkersuisunit sulissanut sallernut ilaatinneqarpoq. Angajoqqaat meeqqallu pitsaasumik toqqissisimanartumillu pitsaanerpaamik atugaqarlutik aallartinnissaat pingaaruteqarpoq. Erninerup nalaani piffissaq kisiat isiginagu, meeqqalli alliarturnerisa nalaanni tamanna qulakkiigassaraarput. Ilaqutariit meerartallit atugarisaat tamaakkiisut isigisariaqarpagut. Taamaattumik aaqjissuusseqqinnissamut siunnersuutinik pingaarutilinnik arlalinnik ingerlataqarpugut.

Siullerpaamik iluarisimaarnartorujussuuvoq, Naalakkersuisut suliffeqarnermi illuatungeriit suleqatigalugit isumaqatigiimmata erninermi sulinnigiffeqarnissamut aningaasaateqarfik pilersinniartulugu sulissutigineqassasoq. Erninermi sulinnigiffeqarnissamut aningaasaateqarfeqalernikkut isumannaarneqassapput suliffeqarnermi pitsaanerusunik naligiissitsisoqalernera, taamaalilluni arnat meeqqiornermi nalaanniittut tunulliutitaassanngimmata taamatullu ilaqutariit meerartallit naartunerup erninerullu nalaani naammaginartumik pilersuinissaminnut tunngavissinneqassammata. Tamatuma ilaqutariit meerartallit atugaat annertuumik pitsaanerulersissavai.

Maannamut ajuusaarnaraluartumik assersuutissanik takusaqartarpugut arnat meeqqiorfimmi nalaanniittut suliffeqarfinit tigujuaneqartanngitsut, suliffeqarfiit naartunermi erninermilu tamakkiisumik aningaasarsiaqartitsinissaannik pissuteqartumik. Maannakkut tamanna unitsinniarneqalerpoq erninermi sulinnigiffeqarnissamut aningaasaateqarfimmik tapertaassussamik pilersitsinikkut, tassuuna qulakkeerneqassammat suliffeqarfiit aningaasarsianut aningaasartuutimik amerlanerpaartaannut erninermi sulinnigiffeqarnissamut aningaasaateqarfimmit utertitsivigineqartalernissaat.

Tamatuma saniatigut meeqqanut tapiissutinut aamma ineqarnermut tapiissutinut aaqqissuusseqqinnissamik Naalakkersuisut suliaqarput, ilaatigut ilaqutariit meerartallit annikitsumik akunnattumillu isertitaqartartut atugarisaasa pitsaanerulernissaannik siunnerfeqartumik, ilaatigut malittarisassat ullumikkut atuuttut paasiuminaalluinnartut aaqqiiffiqineqarnissaanik siunnerfeqartumik, tassami aningaasarsiat nalunaaquttap akunneranut 1,50 koruunimik annerulerpata ilaqutariit meerartallit aningaasaqarnikkut ajornerusumik inissisimalernissaannik kinguneqartarpoq, pissutigalugu meeqqanut tapiissutit aamma ineqarnermut tapiissutit annikillismata. Tamannalu naleqqutinngilluinnarpoq.

Naalakkersuisut isumaqarput, ilaqutariinnut meerartalinnut pissutsit ataatsimut annertunerusumillu isiginiartariaqarivut, piffissami sivisunerusumik atasinnaanerusumik aaqqiissuteqarnissat qulakkeerniarlugit.

Tamanna tunngavigalugu siunnersuut manna itigartinneqassasoq Naalakkersuisunit inassutigineqarpoq.

Naalakkersuisut imaattumik allannguutissatut siunnersuuteqarnissaq siunnersuutigaat:

”Ilaqutariit meerartallit erninermi sulinnigiffeqarnermi/angajoqqaat sulinnigiffeqarnerini suut tamaasa ilanngullugit naliliiffiginerini atugaat misissoqqissaarneqassasut, matumani ilanngullugit ilusiliussat arlallit atorneqarsinnaasut, ilaqutariit meerartallit erninermi sulinnigiffeqarnermi/angajoqqaat sulinnigiffeqarnerini atugaat qanoq iliorluni pitsaanerulersinnaanersut misissorneqassasut. Peqatigitillugu aningaasaqarnikkut kingunerisassai erseqqissarneqartariaqarput, aningaasaqarnikkut atuisinnaanerup pitsaanerpaamik atornissaata nalilernissaanut naammattumik tunngavissaqarsinnaajumalluni.”